

程  
侍  
郎  
遺  
集

程侍郎遺集初編卷八

歙 程恩澤 春海著

河南按察使嚴公神道碑銘

公諱士鉉字震叔又字筠亭江蘇丹徒人先世太學生  
永中居汴當宋靖康時與大學錄陳東等擊登聞鼓請  
留李綱不報遂渡江而南居京口爲遷丹徒始祖曾祖  
之錫祖榮德輕財好施喜交魁儒碩彥鄉里敬之馳贈  
中憲大夫父璟晉贈中憲大夫妣華氏曹氏贈恭人公  
爲中憲第三子少端靜及長儀度修偉性沈毅寡言笑

喜愠不形於色工文辭尤留心經世之學公叔祖元燮以名進士教於家窮經治史旁及星緯象數公從遊盡得其傳乾隆丁酉科公舉選拔以知縣試用四川攝秀山內江題補墊江將赴任以憂去服闋攝天全州攝成都兼攝金堂題補犍爲攝樂山奏調華陽以軍功擢資州尋擢知寧遠府事攝夔州府事奏擢川東道攝布政使攝永寧道攝按察使擢湖南按察使調河南按察使未之任以疾去公善折獄任華陽時有以貲得道職仍充潼商負犍商本不歸犍商訟之某怙勢亂鹽法不爲

屈公讞定禡其職加桎梏豪猾奪氣又有以貲得副指  
揮某利嫠叔母財誣其與壻姦訟諸按察使飭公會鞠  
嫠懷利刃欲自刳于訟庭公廉知之訊其指姦無證乃  
坐誣告者嫠與宗人數百伺公出焚香泥首馬前又富  
家某賃一婢忽逃去婢家以謀殺控公方集人證研鞫  
時按察使承差明招佐者陰偵伺日一至縣庭公疑之  
廉得招佐匿婢狀蓋招佐嘆富家欲陷之公帶幹役出  
不意於二鼓後排闥入獲婢卽禽招佐論如法公發姦  
鋤強類如此平反獄至多錄其犖犖大者公尤知兵乾

隆六十年湖南苗疆軍興福文襄王帥師進剿孫文靖  
再督四川駐節秀山時公攝夔州府事府據白帝控瞿  
塘萃水陸之險又東綰宜昌東北袤鄖陽北指興安南  
涉施南古戰爭地也公亟修水陸營堡誅匪徒潛伏者  
未幾白蓮教匪齊王氏姚之富張漢潮覃加耀等起分  
竄荆襄宜施各府在在與夔州牙錯公亟請於孫文靖  
撥權銀集團勇積穀練兵爲守禦計選健卒數十人布  
所轄六邑偵紆細而大寧之一碗泉開縣之周家槽有  
伏寇公會營弁疾馳掩擊殆盡是時川中教匪尙未蔓

延故旋起旋撥滅文靖又以巫山爲川東門戶檄公守焉巫山郭俯江憑大寧河距楚境不百里而巴東之培石遶箭槽拐子坪皆有教匪欲攻巫山城得則據之不勝則奔湖北與大股賊合其酋曰侯光斗李宗嵩無何侯之宗人告變公時出巡陪石聞之遣親信入山偵卽約都司徐朝綱議剿撫時公度賊密約已久而未發必脇從者眾心力未齊也乘其未發撫之則不煩兵矣語都司都司奮曰朝綱任巫山久與各寨居民習當爲公往公握其手下拜曰君信有膽識某亦同往義不獨令

君勞也各帶僣從數人而分撥兵勇每五里置二人爲急遞脫有變卽馳歸報巫山使登陴守瀕行探卒旋曰居民數萬戶教匪三之一耳公與都司徑入不三十里有冠儒冠者十餘人迎於馬首詢何姓皆侯李也曰來者非太守與都司耶曰然曰是不可入中有教匪數千戶將揭竿奔湖北矣都司曰知之眾曰旣知之何不帶兵而單騎入都司曰吾與太守不以教匪視吾民奚兵爲且爾等不聞湖南苗疆凱旋之兵十餘萬圍賊於巴東之黃柏山不日盡剿無孑遺乎彼棄其田廬墳墓妻

子欲往助至卽授首耳愚甚彼能悔教從我我與太守  
能生之眾頓首泣下曰太守與公來某等活矣某等亦  
誤入教者公於是拔佩刀裂短後衣一幅示之曰所不  
許爾投誠而食言者有如此衣眾曰首逆謀者侯光斗  
李宗嵩耳某等願禽以獻公卽委候補員馬鳴鑾吳國  
鴻各率兵勇往追捕自與都司徐分厯各教匪巢穴宛  
轉曲諭十餘日而徧皆革心爲良民尋獲侯光斗李宗  
嵩斬之公下令赦悔教者於是數千戶人歡聲若雷嘉  
慶二年川東達縣之王三槐徐添德川北巴州之羅其



清冉文儔等蠶起陝西亦然三省連兵會剿而賊愈熾  
參贊德楞泰公駐兵開縣之大團包公在參贊營總糧  
餉乃獻策曰齊團練使之守招鄉勇使之戰參贊遣之  
公招集鄉勇一月餘得萬人選隊長二一爲桂公涵一  
爲羅公思舉今皆官提督總統宜綿公參贊德楞泰公  
奏公勤力奉

旨賞帶花翎時賊匪出沒不恆德公屢挫之因選勁旅  
乘夏漲爲下峽計公馳入夔州集兵船三百艘載官軍  
隨德公自夔門下抵宜昌德公登岸將整隊忽前鋒偵

報賊匪不入鄖陽將竄荊州出襄陽以齊王氏樊城人  
樊城接南陽德公恐震中州計賊匪已過宜昌不可追  
甚憂之公進曰可仍由水路下荊州因手令箭傳呼曰  
兵船無散仍載大兵下荊州舟子皆夔人感公舊政均  
踴躍時宜昌餉絀不能給船值公卽以川餉給之剋日  
請德公登舟德公喜曰此行扼賊不使過南陽君之功  
也果及賊於荆襄敗之復敗賊于鄖陽殲之公以軍功  
加道銜隨德公營至漢中府漢中與保寧接公調川兵  
及餉遂至保寧之廣元而土匪何四蠻刀等欲起應賊

公禽其首撫其餘境內以安大府上其事以道員卽用  
尋授川東道仍留軍營嘉慶十一年陝西寧陝新兵叛  
川東毗陝西省公赴綏定籌邊而綏定新兵亦翻城出  
欲由新寧竄巴山公卽檄桂公涵迎擊盡淨時事起倉  
卒公籌畫凡十晝夜不寐公自乙卯兵興迄辛酉功竣  
凡七年在戎行運用神速知山川奇險故所策多勝算  
恆出諸將帥先耐辛苦尤儉約食等士卒臥一敝穹廬  
不避燥溼寒暑卒以是致顛眩疾大兵之後川北一帶  
州縣有未治城郭者方伯方公積議開南江老林招商

出售可得城郭貲請於常齡公檄公往勘公按行一閱  
月致書方伯以五不可阻之大旨謂南江山谷阻深毗  
陝西漢中爲南棧別支賊匪初平人宜散不宜聚聚則  
易因緣爲姦而兩省墾荒之人不下數十萬皆衣食此  
山一旦設廠伐木是奪其利又老林爲縣屏蔽伐之恐  
地輒傷方公得書白制府罷之未幾陝西南山大饑木  
廠倡亂人皆服公先見襄平相國蔣公攸銛時督四川  
知公練達詢以川省情狀公條吏治兵政邊防盜賊四  
事大約謂蜀中州縣起科目者半起投效者半易分門

戶角技能又瘡痍之後弱宜撫強宜戢當判其才之寬  
猛使各盡其長去其短拘常例輪委則上才屈揣地方  
肥瘠則私門開又軍功超遷往往起微末洊至方面流  
品至雜尤宜審擇蜀中兵久戰故兵強兵強則易叛糧  
帑不可移動訓練不可廢弛以勇將兵以誠將將則百  
萬統于一邊境番夸之黠者北曰果羅克三部南曰瞻  
對三部又建昌道所屬各州縣永寧道敘州府馬邊戎  
邊雷波等處民番交錯易侵占啓釁盜賊之尤者曰咽  
匪咽匪有專律格殺勿論其民浮囂易動故剽掠作姦

不獨莠民富室豪強亦爲之且匿猾與通賄尙巫信祆  
好結盟黨皆教匪之漸公所陳皆遠大蔣公一一施行  
蜀以大治始公以知縣辦西藏軍務大員某廉從入局  
索夫馬勢甚張公立擒治論如法嘉慶四年川督勒公  
被逮以某公代某公至將興大獄公從容陳白以情理  
折之其事遂解人謂公善用剛柔有如此公以嘉慶二  
十四年疾劇在告道光六年就養于楚南官舍八年夏  
感熱疾秋不起享年八十有三夫人趙氏封恭人晉淑  
人先公十有一年卒子三長學瀛候選鹽場大使爲公

兄士銓後前卒次學淦舉人署湖南耒陽縣知縣三學  
澄候選縣丞前卒孫六榕廷枋樽榆標承曾以道光十  
年正月初七日葬公於城西曹王山枝之徐灣原趙淑  
人祔焉記澤官黔時識公門下士廩方伯奇瑜方伯稱  
公德量智術不去口恆奉以爲法尋澤移官楚南以年  
家子禮拜公公時年過八十言語姁姁猶未釋恭去歲  
從蔣襄平夫子遊夫子譽公一如方伯所言嗚呼魁儒  
長者芳烈之昭著如是是可銘也已銘曰

其量淵淵其才磐磐洞深察微秉經達權市朝原野皆

天所棄戰人之命匪仁曷恃五過有疵弱肉餒強公折  
鉅豪剽狼卹危用武之國死若雜草公起白骨授以文  
祿或摧機牙或爭須臾騰超飛行如風御虛燧銷馬卻  
雍容坐論東井有絡西川如鏡冊載服官七年枕戈心  
燔欲枯筋憊猶磨屢筦億鏹退無四壁布囊白髮危坐  
獨息有子謙慎循吏通儒公活萬生流慶必都武惠山  
側嶽嶽華表過者式焉視此有道

戴尙書神道碑

道光十年六月二十八日署工部左侍郎前四川總督



戴公薨於京邸

旨加尙書銜照尙書禮賜卹越七月二十三日禮部尙書湯公金釗奉

旨賜奠於私第戶部工部各遵頒發祭葬銀如例其年秋公之喪至鎮江其嗣君郎中於義寓書於恩澤屬撰神道碑恩澤於公有世誼且辱公知好甚久不敢以不文辭按狀公姓戴氏諱三錫字晉藩號羨門江蘇丹徒人曾祖京鸞祖士鵬湖北嘉魚縣典史父紀入籍順天補府庠生考取三禮館校錄江蘇青浦金匱主簿三世

皆以公貴累贈榮祿大夫例晉光祿大夫母張氏凌氏  
累贈一品夫人公讀書期大用不爲無益之學尤樂觀  
古名賢大君子出處施設中乾隆丙午科舉人癸丑科  
進士以知縣用署山西潞城縣補臨邑縣縣彫劫公撫  
字有方以治行聞時公父光祿公母凌夫人春秋高不  
能就官舍養公思慕不置一旦引疾歸而光祿公凌夫  
人俱馨膳不半載相繼歿人謂孝感若有先告云嘉慶  
五年服闋引

見奉

旨發往四川時蜀方治軍公至卽攝營山縣縣當四達之衝供帳絡繹公籌備無誤補南充縣攝綿州知州擢義遼廳撫夷通判公在綿有惠政去之日父老遮道哭請建生祠公力卻之乃已歷攝資眉邛各直隸州知州成都府通判保寧順慶夔州成都各府知府嘉慶二十一年公再攝邛州時有姦民黃子賢等嘯聚亡命千人約以州試文章日乘間發公偵知聚謀之所屆期仍扁試如恆密遣民壯數百突往捕悉禽之案具大吏欲以軍功奏公請戮首惡一餘以軍流處之得

旨獎飾時公已擢茂州知州二十三年擢寧遠府知府  
道光元年擢建昌兵備道時雲南永北廳夷匪啓釁與  
寧遠界一金沙江川民騷動公募鄉勇集數百人昕夕  
練習防衛永北難民沿江就食甯遠甯遠兵弁欲禁不  
使渡江公謂避難皆赤子悉嫗撫之全活不下數萬人  
兵旣息難民感公德不願旋因著籍於川時制府蔣公  
素以人才爲己任見公略能禦疆仁足撫眾牘薦甚力  
自是公膺特達之

知不三載卽以布政使署總督蓋

聖主知人之明大吏舉賢之誠我公忠實之政遂昭著於天下而天下百職事咸奮勉守道益篤

朝廷遂收得人之效實自公始其年擢四川按察使二年擢江寧布政使引避原籍調四川布政使三年奉

旨以二品頂帶署四川總督後復署成都將軍五年奉旨實授四川總督公久宦蜀知蜀民立懽好勇教不先也於是正書院規制增義學三千餘區拓考舍一千餘區使士表其民民化于士又以治兵定亂須摧其機讞獄科罪須平其衡蜀舊多事非時過乃發致患禍成卽

如殺喜功不幸而激大變七年新都姦民楊守一等倡  
邪教造妖書公弋獲之立正典刑越衛生番恃險遠時  
出沒劫商旅掠婦女僉議欲加兵公但飭吏捕狙黠者  
數十人治之雲陽鹽販拒捕守令以夥梟論公謂售山  
官肆則非私販止十人則非夥當以重辟過矣惟當治  
拒捕罪耳官吏稱允其他濬渠堰水利禁販鸞子女斷  
鎧嬉侈靡掩埋軍興死綏之骨表彰國殤不屈之魄凡  
有關于世道人心者靡不修舉傳云公家之事知無不  
爲惟公有焉七年七月公七十壽前期卽蒙

恩賚并

賜御書敷猷篤慶額時公哲嗣於義任吏部員外恭齋  
赴蜀時人榮之九年內召署工部侍郎奉

命恭詣

東陵

西陵查佑歲修事十年奉

旨以原品休致公具疏謝

恩蒙

召對

上諭以居官甚好全始全終公免冠謝公以久宦思省  
邱墓入秋擬遄歸卽以是年六月得氣壅疾薨於京邸  
春秋七十有三公長身火色目爍爍有紫光性清峻不  
受饋獻事上唯謹不阿從處同列以和不以己長掩人  
短精力邁厚每當繁劇益見縝密極嗜翰墨工行楷尤  
工漢隸手錄書及讐校書盈篋喜讀薛文清呂新吾兩  
先生書記道光元年恩澤典四川試見蜀士民述公爲  
州縣時視民若子姓其班春也過一村墟則父老咸邀  
停車奉茶果爲壽婦攜幼稚纍纍環車前公類能指其



姓氏與父老話農事課雨晴偶及家人瑣屑皆歡然應  
雜然諾間有以事角口者求辨于公公爲譬況卽散去  
歲斷獄甚簡於戲庶幾古循良之風復見於今矣公配  
張氏累封一品夫人子一於義甲戌科進士官吏部郎  
中女一適山西試用知縣呂兆熊孫一朗女孫一以  
年 月葬于山之 原銘曰  
大善之積自微成著下位廿年曾不數載  
天子有命統東西川

天子壽公公七十齡不懈益虔文師文黨武師武鄉謀

略炳然人震貴速民知

主聖公宜累遷所居父在所去母失咸戴一天封圻遠  
民惠罕下逮獨公如前鄙赫赫名曲突火始拔毛斧先  
歷少壯老束身清勤植志貞堅

恩禮始終進退綽綽曷歸乎田不及省墓公心不怡奪  
公何遄墮淚之碑遺愛之碣過者式焉

贈長蘆鹽運使伍公神道碑銘

公諱光瑜字孚尹號屏秋姓伍氏始遷祖德全精庠學  
明洪武朝授刻漏科博士掌欽天監事賜第宅居金陵

歷五世皆世其官六世少西以助振賜四品冠帶旌曰  
高義曾祖致遠以嗜古善鑒藏稱祖宗鯉以孝稱父守  
旂太學生以廉讓稱兩世俱累贈中議大夫妣楊氏陳  
氏俱累贈淑人公生三歲而孤少卽穎悟母督讀書寒  
暑無間稍長治羣經尤邃于易善讀史嘗錄成事核所  
行得失性好善見善必爲爲必有成乾隆間上元江寧  
兩學宮將圯公與同學倡一錢約積數年整其圯如新  
嘉慶廿一年羣議重建江寧府學明倫堂賴公成之廿  
四年大成殿災節相孫公玉庭議修復公又成之是年

九月之晦大成殿先考漏初下殿上騰白光如晝又十一月晦日將夕有黃雲羃櫨星門蓋公自束髮時每月朔望必齋沐拜大成殿階下及是又督工竭心力人皆謂誠敬有符驗由積累所致云公倡恤嫠局曰同善堂行之有成效而慮宦士族之嫠不能與歲暮必措貲計戶厚飲之公倡球生局曰生生堂法於大江磯湫設拯溺船一歲內風濤險巇全活無算又塗有殣者恆以廩民畏牽匿不報致暴朽公偕眾白之大吏定規制凡途殣卽報局驗瘞嘉慶十九年江寧大旱百文敏公募助

振公時方抱疴力疾偕紳耆勸輸凡五振九閱月乃畢  
大吏入奏奉

旨議敘主簿銜公以餘羨白大吏發質庫權子母作備  
歉用迨道光三年大水發節相孫公復勸輸不給用而  
公所請權子母已積鏹二萬餘取以益之乃足上元江  
寧軍船之制有運籍有快籍快丁例助運丁費苦累殆  
不支快費不解則官呈議催比急則丁死官與丁已交  
困又快丁啖黠胥口攀齊民誣在快籍比辨明家已破  
則困及齊民先是漕督許公兆椿守江寧時置官洲以

劑快丁困而每年運糧造舟之助尙不給公請借庫貯若干勸快丁募捐若干皆權子母而運造一旦俱給是舉也快丁有恆產則丁便民免誣攀則民便官無催比過當則官便無繳繚糾纏則運亦便於是江寧所轄各縣有快丁籍者俱仿公所爲行之循江至安徽聞風相效蓋公倡率之功幾徧東南維矣澤至江寧公適病尋卒凡哭公者皆失聲因究公樂善之專魄力之厚則咸謂公至孝友務調卹自門內逮姻友俱徧乃知推暨覆被之廣且大由孝友然也不先本原而務施博又烏

能施博哉公好詩著有補園集以道光十年四月卒于里第春秋七十有三歲貢生候選訓導議敘主簿銜以子貴累封中議大夫夫人馬氏累封淑人性好善與公同志凡義舉助公尤力子若孫曾林立且教且撫寢門以內離離如也上下忻忻如也先公三年終于長蘆官廨春秋七十子六長齡歲貢生舉孝廉方正以知縣用長華進士 廷試第三名授編修累官長蘆鹽運使長英舉人湖南常德府同知長松長馨俱庠生長貞殤女三長殤次適孫玉銘次適馬功浩孫十女孫十九曾孫

女二以某年某月之吉葬公某山某原銘曰

葉陽助王息厥民億萬人值銜溢恩手拯活之口弗論  
護聖杖履鍾離意葺絲竹壁謹戲慨凡公所守敬無肆  
積善衮衮福其嗣

戶部福建司郎中鶴皋祁公神道碑銘

公諱韻士字諧庭一字鶴皋姓祁氏山西壽陽人祁爲  
晉巨戴其占籍壽陽自河東公始至公十有五世曾祖  
敬德祖雲瑞贈朝議大夫貤贈榮祿大夫父文汪贈朝  
議大夫晉贈榮祿大夫妣賈氏贈太恭人晉贈一品太



夫人公穎特善屬文自幼喜治史於疆域山川形勝古人爵里姓氏靡不記覽年十有九館於靜樂李氏李氏多藏書書樓十餘楹且弄善本公寢饋凡五稔益博洽乾隆四十二年拔貢生是秋鄉試中式明年會試中式官翰林五十年大考翰詹名列二等五十四年京察一等記名以道府用五十五年擢右中允五十六年大考翰詹改戶部雲南司主事嘉慶四年授河南司員外郎五年升郎中秋八月充順天鄉試同考官六年充寶泉局監督在局兩載九年局庫虧銅案發歷任監督皆逮

問下獄故事交卸憑冊籍不盤盤有期公不及盤期故  
無自檢覆十年同逮之監督五靈泰遣子申訴得末減  
發熱河公與宗室鳳麟等戍伊犁始公在史館也奉

旨創立蒙古王公表傳嵇文恭爲總裁知公深屬公任  
其事公核立傳體例計內札薩克凡四十九旗外札薩  
克若喀爾喀土謝圖汗車臣汗札薩克圖汗賽因諾顏  
若青海若阿拉善若土爾扈特杜爾伯特多至二百餘  
旗及西藏及回部均應立總傳分傳而苦無徵館送旗  
冊亦雜亂紛糾卽人名重累驟不可逗乃悉發大庫清

字紅本分檢之有涉外藩事跡者擇要詳譯作底冊每于塵空中有所得共詫爲異聞於是按部落條析之人立一傳必以見諸

實錄紅本者爲確復據

皇輿圖西北垂疆域爲綱領據理藩院世譜訂王公等派系凡八閱寒暑而成計書百十二卷終始佐公者則郭檢討在達也及公戌伊犁也則創纂伊犁總統事略別摘山川疆里爲西域釋地蓋公學自乙部入窮源溯流薈萃貫弗能擘其鉅實經世可施用性介直自將不

逐時爲俯仰遂見抑於權要力殫苦不食報而師友皆  
名儒偉公以文字受知則朱文正王文端阿文成紀文  
達曹侍御錫寶金殿撰榜汲引若不及戴文端那文毅  
松文清則服公才識斷大事必咨之及其趨萬里歸來  
以著書佐治授經老爲客而歿嗚呼可悼惜也已公繼  
室劉夫人智識英毅公遣戍後家破夫人攜子輩還壽  
陽亟延師爲授學以鍼黹所入具師饌必潔酒肉而自  
攻苦食淡比公歸公之嗣君今閣學雋藻學有成入翰  
林人謂慈教半嚴教焉及閣學視學楚南背公久矣太

君訓之若童時小拂意輒令長跽受杖環楚南人皆頌  
學使之廉敏有所自署內外斬斬無不憚太君者恩澤  
與閣學契交且同直十餘年一日閣學謂恩澤曰憶先  
公在狴犴奏當重辟檇藻甫十一齡與世昇實侍側聞  
翼日讞上當勾檇藻股弁泣涕不自勝先公意殊泰然  
就燭下爲削詩文章數首引枕鼾睡迄今思之森森  
若身置刀戟林也嘉慶二十年三月二十五日歿於保  
定書院年六十有五官郎中 誥授奉政大夫以子貴  
晉贈榮祿大夫內閣學士兼禮部侍郎加二級配弓恭

人先公卒年三十劉夫人後公卒年七十有一皆贈一品太夫人子六歲藻增貢生四川鹽場大使宣藻殤宗藻國學生候選府檢校富藻殤爵藻內閣學士兼禮部侍郎南書房行走宿藻舉人女三長適候選訓導王敷政次適兵馬司吏目閤庭椿次適候選訓導張麗暹孫七世龔優貢生候選訓導世庾庠生世齡舉人世舒國學生世佶世敦世長女孫二公著有藩部要略若干卷西陲要略若干卷西陲總統事略十二卷西域釋地二卷萬里行程記已庚編書史輯要珥筆集袖爽軒文

集覆瓿詩集濛池行藁西陲百詠訪山隨筆若干卷嘉  
慶二十三年公暨弓太夫人葬於葦上之原道光十有  
四年八月某日劉太夫人合塋封閣學屬恩澤爲神道  
碑銘於墓道東南銘曰

公性介而和伉爽而英多學璞沈而輝華喜會友以文  
清酷雅歌括史例通國書指掌輿圖蔚然著作家才富  
遇嗇命也柰何不於其身於子若孫視此豐碑之峩峩  
光祿寺卿興縣康公神道碑銘

道光十有四年四月二十五日前湖南巡撫康公薨越

明年其孤兆奎以武進李兆洛所爲行狀乞余銘神道之碑余故知公者故剡其大要以顯焯之按狀公諱紹鏞字鏞南別字蘭皋其先自陝遷山西清源數傳至登有又自清源徙興縣今爲興縣人曾祖萬方祖惇俱縣學生贈資政大夫江南河道總督晉贈振威將軍生基田官南河總督次基淵卽公考也與兄皆以進士縣令起家厯官江西廣信府馳贈中憲大夫晉贈振威將軍兼提督曾祖妣郭氏祖妣王氏妣孫氏王女生妣顧氏皆贈封一品夫人公兄弟七人於次居五生而資性過



人年十二廣信公歿於任執喪如成人乾隆壬子科舉  
山西鄉試嘉慶己未科成進士引

見用兵部主事補軍機章京充會典館總纂修官歷兵  
部郎中鴻臚寺少卿通政司參議大理寺少卿鴻臚寺  
正卿公之官大理也當嘉慶十八年林清首亂畿南山  
東河南教匪響應公方隨

扈塞外作小冊備書三省阨塞險要及將弁能否兵數  
之多寡適會

上問當軸卽以其冊進

仁廟由是知公才可大用擢安徽布政使

陞辭

上命之曰爾有老母皖江一水可通毋慮迎養時安徽四十餘縣皆旱災公諭勸富室捐資各振其鄉凡輸銀九十萬兩米麥七十餘萬石益以帑項數十萬兩荒賴以濟然皖省數災而藩庫止存三十餘萬兩其借支款項有出無入公嚴杜借支當奏銷時卽於州縣應領項畫抵正供省一領一解之費庫貯增多二年之內實積帑三百二十九萬八千餘兩某年擢安徽巡撫公自少

負文武材機神開張不主故常鱗雜粟錯消以囊篋喜  
跡弛異量之士務立名義功業有可成就及任封疆益  
以艱鉅事爲已任不恤常談浮議安徽巡撫銜故兼提  
督而廬鳳潁民俗悍輕備宗瞞氏之族村里相望又洪  
澤湖大江及阜陽亳州水陸奔轆爲私梟擒匪所出沒  
公相其扼要繕營房立巡船先後擒治李才楊七等五  
十餘人奏置之法盜乃戢又擇標下伉健者每日五十  
人入內射堂角藝募精技擊者教習而時賞罰之公自  
幼喜習騎射所至完器械簡卒伍後在湖南造擡槍數

十桿以教撫標二營至搖人稱亂猶賴其用二十四年  
調任廣東時總督祝

嘏入京兼署其任明年三月入

覲奉

命於回任時赴豫察視馬營壩及儀封漫口

今上元年有

旨查辦陋規公奏數千言大意以陋規入奏似非政體  
若奏減其數則不減者官吏皆明目張膽視如廉俸而  
已減者且額必私增若盡裁之官不能堪反益病民議

遂寢在粵二年先後緝獲劇盜會匪數十案行旅以安  
是年六月入京署禮部左侍郎奉

命偕相國松筠赴浙查辦事件丁顧太夫人憂服闋以  
禮部侍郎出爲廣西巡撫旋調湖南巡撫苗疆自故按  
察使傅公鼐經理之畏帖者二十餘年公視事後卽修  
葺傅公所築碉卡二千餘處禁民人毋得入苗疆射利  
以兆釁端洞庭湖多盜環湖州縣以水上道里遠近不  
明相誘避盜不時得公定其界址爲圖常置左右嚴徼  
巡令無文武無敢不用命編查漁舟如保甲法盜無所

容而公猶以苗疆自初平時官其桀驚者羈縻之今日  
久倚官作威致凌犯自相殺不治則損威治之則法重  
如戕官例難盡行多設苗官未爲有益反益生事惟詳  
考其所轄道里近遠可歸併者缺出不補以次漸裁庶  
無後患欲陳奏之未發也而適值六年水災其醴陵茶  
陵數縣城郭皆敗壞民田廬無貧富皆盡捐輸不可行  
而費用廣視安徽旱災事尤劇分率司道分行撫卹拯  
民於高阜而棲之行糜粥及藥物棺槨乞

恩展振及修屋宇費皆得

俞旨公伯父河督公善言水利公幼習之撫安徽時修堤堰於濰河北股河以遏黃水由減水滾水諸壩軼入靈壁宿州者又築捍江堤千二百丈於無爲州之黃絲灘及湖南水災後復澧州田侵入夕陽湖萬四千五百畝排水去污皆可耕其不可耕者萬一千八百畝豁免起科分別奏行至道光九年入

覲陳苗疆事宜

上命與督臣熟籌之議未定而公入爲光祿寺卿旋致仕道光十四年四月二十五日卒於河內里第年六十

五公直軍機十年受特達

知巡撫四省

賜天府圖書稠疊優渥所建立多灼灼可指白而公常  
慊然未盡與僚友言每深慕孫文定陳文恭之爲人也  
事太夫人竭情承歡不計費多寡深友疏客莫不意滿  
配封一品夫人趙氏子二兆奎正二品廕生刑部直隸  
司郎中 記名以道府用兆臺國學生孫錫齡縣學生  
與齡成齡椿齡億齡俱幼以道光某年月日葬於某縣  
某鄉某原銘曰



謹出納以裕封樁不積而贏是師研桑日肆金版補苴  
泰平要隘允猶可治川治兵筦數大事雄略偉斷憑陵  
談笑懦者悚難事君事親有古名臣我稔知之於洞庭  
之濱流丸歐與公稔知之我銘幽宮實無媿辭

翰林院修撰汪先生墓志銘

高宗純皇帝御極之四十五年歲在庚子臨軒策士時  
賜及第第一名二名三名皆鴻才博學負天下清望而  
先生以會試第一膺

殿試第一授職修撰年甫二十六長身玉色眸子顧盼

炯然朝宁偉之四十八年充三通館纂修官本衙門撰  
文是年冬奉

旨入直

上書房五十一年典山東試是年冬督雲南學政使還  
仍入直五十六年以本生母憂去官五十七年冬服闋  
仍入直五十九年八月十五日先生疾終凡通籍十有  
五年得年四十先生姓汪氏諱如洋字潤民號雲壑浙  
江秀水縣人先世居休寧國初遷桐鄉曾祖繼燦吏  
科給事中祖上墳雲南大理府知府父仲鈐舉人贈奉

直大夫母許氏封太宜人本生父孟錫進士吏部文選  
司主事誥授奉直大夫以先生兄如藻官晉贈朝議大  
夫本生母祝氏贈宜人晉恭人金氏封宜人晉太恭人  
汪氏自先生以上五世文望輝赫祿位踵於朝先生  
蚤慧博覽典籍雄於文豪於詩試輒冠軍每一篇出口  
相傳以熟走數千里垂數十年諷詠者恆不絕及其冠  
倫魁侍

禁近文若詩益鴻麗名益譟天下士識其面者以爲瑞  
性沈厚喜怒不形外和易內方介守潔用敏設措部分

才常什伯人其視學滇也滇士志學而苦無師先生行  
敎家塾子弟法每試一題則操管成一藝試畢示諸生  
卽召諸生環案前爲評隲點竄言語姁姁使充然各有  
所得於是滇之文日以上旁及詩賦皆雕繪可誦值已  
酉遴選科得人稱極盛時功令當以五經並試先生以  
士專經久遽使兼習或未能驟通奏請每科以一經輪  
試輪畢然後並試得

旨俞允先是大理公惠愛在民歿有廟祀屢著靈異先  
生按試大理拜謁於廟郡人以爲明德之後必有達者

天道之可信如是相與焚香擊跽以送先生自使滇還朝

帝心益眷顧

優獎渥賜俱稠疊而先生涵養淬厲躬躬匪懈知與不知皆以公輔之望歸之孰意年甫至疆仕官未轉一階抱其瑰瑋奄卽長夜有識者皆歎生才之不易而才不竟其用爲尤可惜也先生同及第第二名爲江丈德量其三名卽先大夫先生視滇學

上書房缺出先大夫實充焉又先後同直廬出肺附論

契好每當春秋佳日唸和談讌翛然意遠其視權要熏  
灼之門若水火之不可蹈憶恩澤總角時先生一日偕  
江丈集先大夫廬恩澤出拜謁因得識先生風範迄今  
思之座次言次悉在眼亡何江丈先歿次年先生歿次  
年先大夫歿嗚呼其舉也連茹其歿也踵相接知先世  
結締非偶然而恩澤以十齡孤露之身忽忽三十餘年  
追銘大君子之墓抑何幸也又何哀也夫人陸氏封宜  
人例晉太宜人清德世宦篤生賢淑逮事二姑皆得歡  
心先生早世而家以不墜教其子成名繼志以揚以顯

皆太宜人力後先生三十六年而卒享年七十有七子  
三世植邑庠生世楠附貢生雄縣知縣世樽進士官編  
修提督湖南學政女三長壻江西贛南道加按察司銜  
潘恭常次壻直隸香河縣主簿管嗣許次壻邑庠生熊  
鍾祺孫三葆煜葆烜葆光女孫六先生著述甚夥多散  
逸惟葆冲書屋詩集若干卷手自編也詩奄有唐宋諸  
大家風卓焉可傳以道光九年十二月吉日合葬於嘉  
興縣六萬金港之原銘曰

豐其才嗇其德則不竟其庸也先生則才曩括於德中

純鉤之銛而夫褻其鋒宜壽且崇而位未躋乎列卿書  
未滿乎名山尤可恫也宜後之人接武而隆隆也

候選同知李君墓誌銘

代

君姓李氏諱莫字堯階號竹君故金陵世族也曾祖國  
柱祖春父師韓厯任石阡南康知府 誥授中憲大夫  
晉贈資政大夫妣淩氏封夫人生母徐氏封太恭人君  
年十二資政公及淩夫人先後棄養君哀毀骨立如成  
人事生母徐太恭人孝養周至尤慎疾疾則晝夜旁皇  
無措必安乃釋昆季凡六君居四志趣不必盡同君處



之盡恭友仲兄蘭疾篤君念承先業非仲不克支乃焚香告天願以身代仲沒後教猶子尤盡瘁兩江秋試人數至多恆苦號舍隘每錄遺輒多所屏棄君請於邑宰白大吏願捐貲購隙地增號舍遂剋日鳩庀得八百餘間多士德之嘉慶十九年江寧洊饑君捐貲無慮巨萬復于城西永慶寺設粥廠目視手告疲烝不少休使老羸皆得所全活無算君家世席豐膳約出之人以爲侈謙出之人以爲倨君錮錮守盈泰之戒故堅持淡泊之志力行施予之惠誦法談道一滌金幹玉相之習而靜

慧相發藻翰炳炳亦非時輩所跂及余知江寧府時君  
應童子試見其文異之事竣來謁則儀兒玉映進止溫  
雅知其澤於詩書者深是年君遊邑庠就余問字余欣  
然以爲爲國家得一俊傑尋余莅淮徐君送餞江潯  
猶殷殷訂後約不數年而君之凶耗至矣世有豐其德  
嗇其遇者則必不嗇其壽今君數舉未得一第而其年  
甫壯而折若有可爲盡齋以歸九原嗚呼是可哀也已  
君生於嘉慶二年六月卒於道光十一年二月得年三  
十有五上元縣學附生候選州同知 賜五品銜 誥

授奉政大夫贈封中憲大夫娶于氏封恭人子二長作霖次作柏女一以年 月 葬於 城之 山原銘曰

崇其心田真意盎然以從王事則專也處富若飭施人卽忘以蓄已德則昌也舉舉其兒熊熊其文宜珌青雲而齋志未一伸也棗強之墓輔嗣之墳是生大雲以覆露其後昆也

王君元長墓志銘

君諱大善字元長姓王氏世爲歙人曾祖廷格祖士璠

父文述兩世皆贈奉政大夫妣余氏贈安人君性強立  
能任事尤工心計世父某業淮北鹺算絀多負命君振  
之君力竭度無可爲棄而之毘陵毘陵亦世鹺業也君  
稱貸籌什一業以大興嘗語人曰凡業鹺當察天時審  
人事知物力贏絀則天時得知俯仰高下則人事修然  
非巧算不能解故特精乎算凡數過百億則持籌者苦  
茫昧君卽屈指高倡曰若干算持籌者必往復詳核曰  
若干算如君言蓋君算沙等恆河亦不持籌也澤昔經  
毘陵恆宿君肆之別齋君每犯星起服浣濯衣儼坐容

止清肅子若弟雁行侍稍通悅卽斥友朋造語皆唯謹  
心甚異之及處里門聞族嬪待君舉火者手指數百而  
君不特無德色人偶詢及輒引愧自咎恆若不懌嗟乎  
明算科不講久矣自司農司空之屬不能舉其鑿而奸  
吏日以文巧變亂射利君之算乃有天授不得爲在官  
用以市隱終可嘆也已君由太學生捐輸議敘通判銜  
加二級封奉政大夫以道光九年六月十五日卒壽八  
十配鄭氏繼配項氏陸氏子一太學生國屏先卒女九  
孫一曾佑以年 月葬於 山 原銘曰

其營拮据其施專餘九族待其餽宜其考終于堂而哭  
弔者塞路隅也

通政司副使顧公墓志銘

公諱蕤字希翰一字吳羹號南雅其先世自江寧遷吳  
縣有貞孝先生名國本者載吳縣祀典爲公五世祖曾  
祖漸考授州同知祖階升國學生考應昌國學生俱贈  
中議大夫妣汪氏贈太淑人公中嘉慶七年進士官編  
修十三年充會試同考官十七年

御試翰詹公名列一等擢翰林院侍讀是年放雲南學

和作直隸學士  
政廿五年授日講官秋九月擢侍講學士十一月上疏  
不稱

旨降編修道光九年擢右中允擢侍讀十年擢侍講學  
士十一年擢通政司副使十二年五月卒春秋六十有  
八公爲詞臣儒官凡三十餘年文學動天下而結

主知崇物望實以奏疏顯其督學滇也道河南以風聞  
墨吏奸民入告嘉慶十八年聞逆匪林清變疏稱中禁  
嚴密若輩敢闌入肆猖獗則固明園距都城遠尤宜備  
其擢學士也適值

仁宗升遐後疏稱方今時勢所急惟崇君德正人心飭官方三者爲尤要今

上召見凡

稱所言都是者三其復遷學士也疏稱西域逆回滋擾不難鋤慝於目前而難弭禍於日後欲請於喀什噶爾添重兵控制安集延俾回人不敢窺伺且其地密邇英吉沙爾葉爾羌又東南爲和闐皆有水草可耕牧宜募民屯田以備戰守更請

慎簡大僚無分滿漢務得讀書識大體者任之以廉靜



竊欲通達事理者佐之其遷通政司副使也適湖南北  
江南江西浙江皆大水疏稱飢民與鹽梟糾合易生事  
鹽梟不盡去終爲巨患緩治之則養禍深急治之則召  
禍速故欲禁其妄行必先謀其生路復請變通鹽法聽  
民挾貲趨產鹽地收買隨時納課收課之後卽不必問  
其所往俟鹽產盛丁力紆卽令課歸丁不限疆域二疏  
俱留中公課士嚴而恩簾閣據几口講手畫懇懇忘倦  
必其人領悟乃已滇士翹穎者多出其門來京輦者多  
就公問業或就公廬止舍凡四方士經指授者皆砥躬

礪行有文學能自立而公文壇老尊宿之譽日益四馳  
知與不知皆欲乞書畫以自飾爲詩文師大蘇賦駢體  
俱師唐宋書由歐陽率更入晚乃倣褚登善間亦作墨  
績嗚呼卽所造就已必傳無疑而公所學深醇實能通  
政教之源以生平所讀書反諸身驗諸事爲當世拯溺  
揅焚之具加以忠愛慘摯急公忘已有所見聞必獻之  
於

當宁或冀一行卒也屢荷

褒擢駿駿乎且大用而公衰病不能待矣史稱陸宣公

言本仁義炳炳如丹如公其庶幾乎配汪氏贈淑人以  
其妹爲繼室封淑人子剛曾殤以猶子條曾爲嗣女二  
長適吳慶華次幼以 年 月 日葬公於 縣 山  
之原銘曰

弋名者鳴其利私其實也絢名者鳴其名沽其直也慘  
懷于君國近不暗遠不喑不卽而必鳴其言夷且貞請  
以觀先生

兵部尙書王公墓志銘

道光八年平西域功成

皇帝臨午門受俘兵部尙書以組縛逆酋生獻闕下萬眾爭覩驚歎而青陽王公適掌兵部禮成得越等褒賞公供職益虔久不懈

上亦倚畀不輕改他職任兵部尙書凡十六年道光十七年正月薨於位

天子震悼

詔以清勤端謹克盡厥職褒之

賜祭葬如禮子元榜乃以公狀屬恩澤爲之銘用不敢辭公諱宗誠字中孚又字蓮府青陽王文僖公子也母

阮太夫人以乾隆戊申年中順天鄉試舉人庚戌成進士

賜及第第三人授編修歷任禮部侍郎署工部侍郎工部尚書終兵部尚書 誥授光祿大夫 經筵講官 賜紫禁城騎馬當

純皇帝

睿皇帝時嘗屢爲雲南四川陝甘省鄉試主考官會試同考官及文武會試總裁於河南山東江西皆久任學政及

今上卽位時閱 殿試 朝考散館卷凡數科門下士  
旣多貴顯矣而公又少年早取科第文僖公官禮部侍  
郎公已爲侍講學士同扈

蹕東巡

睿皇帝幸翰林苑父子同席

賜宴

和詩

純皇帝實錄成公以詹事爲纂修

賜宴禮部而文僖公官尙書爲主席後文僖公以年引

退公又相繼入直

上書房

奎章珍器

賞賜重疊其一家父子極文臣眷顧之厚蓋同時所無  
雖

睿皇帝亦嘉歎其兩世知遇忠謹自將時發

天音而垂

清問也而公謙牧自處接同官及舊嫻疏友寒畯後輩  
皆自居敵以下不敢與鈞禮後進見公或避去不敢當

三 粵雅堂叢書



高顯凡鄉里稱篤行者鮮不以名父子爲首稱焉其他  
嘉言善行施乎家及乎朋友故舊尤人所易知者不具  
載也公生於乾隆二十九年四月二十六日薨於道光  
十七年正月十二日年七十有四配江夫人繼配翁夫  
人大興翁學士方綱女皆先公卒子元林廕戶部主事  
及三子元枻太學生四子元琛皆早卒今官刑部員外  
郎者爲次子元榜女三適上海趙榮貴州邱煌上元董  
斯廣以某年月日葬公於某鄉某原銘曰

九乳垂天作鎮青陽歸神於公父子正卿公逢福世粥

粥日晦植棟如林不私一士高門峻城奸莫敢攀惟其  
和光不怨而慚用承天寵保世禔躬哀榮之典以奠幽  
官

吳篁洲遷葬志

君諱鎔字篁洲安徽歙縣人曾祖尙遷祖文玉父燁光  
祿寺少卿乾隆朝官御史直聲震朝野君以名父子工  
詞賦應戊申科

召試

賜舉人屢試不得官以平山縣教諭終寄籍京師歿葬

永定門外翟家莊子贊癘操履極謹飭溺苦于學飢寒  
齋志以歿無嗣君門弟子鄭上舍復光痛君祀之將斬  
也謀于同里諸君醵錢若干以道光十四年十月十二  
日遷君柩及配蔣妾某柩凡三于石榴莊歛義園俾祭  
掃無闕時上舍適有西河之慟抑哀制淚奔走數日乃  
定計嗚呼俗益衰薄有子孫愁置其祖若父放不祀而  
餒其鬼者上舍乃門弟子獨惓惓于塾師而爲之謀永  
久之祀而同里諸君推友誼以及其所尊事皆激于義  
可爲世風勸且也乾隆間倡建今歛館者卽光祿公也

其子孫之流寓者乃托于義園以食抑何不幸哉雖然使上舍無此舉則光祿不享爲善之報矣今門弟子一倡而會葬者響應皆詩書之緒所衍抑何幸哉

### 汪君別傳

汪君炯字士光號春齋歙人系出唐越國公華後曾祖景晃有醇德婺源江經師永爲立生傳稱其孝友睦婣任恤祖泰安養志潔身秀水鄭贊善虎文稱爲隱德君子父孝漪爲父吮疽以孝聞君承三世舊德益自淬厲爲端人事繼母以孝調嫺嫺以惠澤躬以詩書凡相知

契有喪葬嫁娶不備禮者皆飲成之乾隆丁未甲寅壬戌年鄉里饑發粟減直全活無筭家廟祖塋但有修葺皆傾橐計不下萬金行賈之暇輒手一編尤喜與文士接立文社約並捐貲爲應舉者助嘗勸人不自言不俟人請不責人報然受金者輒稱道不置居恆告其子曰吾曾祖明若公得江先生之傳而傳吾感慕江先生故自號曰脊齋子孫其勿諉也卒年六十有五子三時育有時譽

論曰假人不德不責食人不使不役親戚愛之衆人善

之所謂隱德君子也昔文范先生以三世名德著況四世乎吾鄉多隱德其子孫或達或否然達者或遽謝而不達者終亦必達且曼羨也吾於汪氏卜之

湖南提督軍門楊君繼室龍夫人墓誌銘

夫人姓龍氏四川成都府華陽縣人曾祖某祖某父延泰乾隆辛酉科舉人官至廣東佛山同知夫人年廿二歸軍門時軍門已貴顯爲總兵夫人幼讀書洞曉大義才果識偉柔而能強溫淑而敏斷與軍門愛敬無比嘉慶十一年春軍門以寧陝鎮總兵攝固原提督夫人留

寧陝署秋鎮所轄兵叛戕攝總兵某及中軍遊擊等先是額兵六千名例月給米折銀三錢遭匪賊蹂躪物值益昂所領不給食軍門白經略某具疏申請部議權加二錢俟三載後再定議及是執事者停支待報兵忍饑兩月有叛意攝總兵某不善撫以威裁之故有是變時七月辛亥也有聞叛而請夫人行者夫人曰不可若我出而兵叛是知賊情也人其謂我何至夕叛者蠶起焚廨舍劫軍民在官眷屬暨民婦女皆驚竄依夫人爲逃死數時未叛者譁於內曰夫人勿死我輩受主帥恩財

入當以死拒脫不敵主帥歸見我輩屍見我輩心已叛者譁於外曰夫人勿驚我輩受主帥恩今迫而叛不與夫人夫人勿驚卽仇怨有避夫人側者亦不報也夫人端坐後堂戒奴婢曰死生有命敢號泣者懲之嚮明叛眾叩閤請謁避難者皆繞夫人哭乞勿納夫人曰愚哉若輩欲入卽入孰能禦之請見則見何懼爲命啓門叛首數十人手血淋漓環伏堂下痛哭曰我輩罪大惡極將欲竄身山谷緩須臾死恐去後有驚及夫人者求夫人行夫人大聲謂曰若輩雖戕官爲首者洵不可追於



多人何尤主帥且夕歸且爲若輩白其事於朝非盡殲  
也可各罷歸伍不然斬我首去眾曰我輩血誓同死生  
能聚不能散乃舁輿以俟夫人將升輿避難者千數百  
人齊慟曰我輩死矣夫人復諭叛眾此總總者須隨我  
出毋傷殘眾皆唯唯於是出婢子衣履與在官眷屬結  
束先行乃肩輿殿其後出署眾復請曰昨宵廳城亦同  
時破眾掠未歸歸卽傳來立隊夫人曰止何等狂悖而  
猶循此規制耶在此者亦毋張皇恐多人驚眾復唯唯  
送至澗溝痛哭而返癸丑夫人抵興安越十有四日公

子承注生會軍門自固原策單騎馳千二百里入叛軍  
收降撫逸籠束歸伍乃誅其尤凶橫者而衆情泃泃有  
悔降意於是叛首蒲大方等請於軍門往迎夫人以測  
軍門心軍門不介一奴許其咸往夫人冒雪抱公子泰  
然登程蒲大方王奉口角毆夫人止之至漢陰廳夫人  
踞坐使左右鞭蒲大方四十械而行者三日始釋之見  
軍門絕不言尋羣帥官屬來賀夫人以其事詢軍門且  
偵叛衆意軍門乃問夫人所以不告之故夫人曰知而  
不言是廢法也告而加誅法無重科爲妾謝衆官妾不

見徹不敢發發而眾情貼伏何問爲眾官皆嘆服而退  
軍門以卒叛故戍伊犁尋赦歸攜夫人還里侍某太夫  
人養蓋自夫人歸後頻年多故甫得謁太夫人太夫人  
風緩不能言手索頤指惟夫人會其意日夕在側太夫  
人喜見於色幾忘所苦亡何軍門復起鎮廣東奉太夫  
人行夫人從軍門移鎮陝西甫之官而太夫人卒夫人  
素善病至是益困然偕軍門返里門力疾營葬備盡哀  
禮居恆謂軍門曰方寸靜潔則理勝欲念慮牽繫則欲  
勝理人生最忌情流爲欲當軍門撫叛卒時自謂功足

以贖過而夫人謂曰君必赴伊犁當別經年顧屢立奇績不久卽還耳卒如夫人言嗚呼若夫人者可謂明智矣夫人教子極嚴善鼓雅琴工畫蘭時時爲之不倦以道光五年十一月廿五日薨於湖南提督署之內寢年四十有三 封一品夫人子一承注 恩蔭一品監生娶福建按察使蘇公兆登女女一字原任陝西華州知州劉君某之子宗浩孫一恩棣以是年某月某日葬於某縣之某原空其左方爲它日合窆計則公子承注當夫人綿悷時度其意而請之禮也銘曰

猗歟夫人識力堅定相厥夫子勸勉以正作嬪之初旣  
榮旣都鳳車翟衣龍節虎符夫子好文對講師律心兵  
不擾乃築鐵室主帥遠適叛軍一噪男走女呼環城動  
搖主帥有恩夫人贊之欲語叛軍麾以散之叛徒求謁  
夫人踞見責以大義示以不變攘攘沙蟲爭舁魚軒夫  
人叱之噤不敢言提嬰挈姆依夫人所翼之嫗之遂脫  
禍習其時夫人孕玉將產無驚無恐竟得雛鸞主帥亟  
歸招降叛軍叛軍疑之請迎夫人叛酋忽門若門兩虎  
夫人鞭之若縛兩鼠帥謫帥還乃移歲陰有姑白頭風

緩不斟攜手歸觀載色載笑姑意甫動夫人以告夫人  
有子賢而多能教督不休大愛似憎娛此泰平夫敬妻  
佩無忤君父能治內外生犀繞帳鼓琴終夕曲罷寫蘭  
華葉盡碧嬋曜忽隕將星蒼涼幸卽珂里一舟可航靈  
風灑灑瘞此明月女丈夫碣過者無忽

先母項太恭人事略

母諱

字玉書歙縣人父雲騎公際會母程宜人項

固歙巨戴雲騎公任俠負逸氣能書畫騎射與我先大  
父朝議公爲中表館先大父於家課子若弟時先大夫

學士公童年絕穎異誦十三經若流雲騎公奇之母讀書內塾亦絕穎異以歲時伏臘謁先大父道勝常進退合度若成人先大父亦奇之婚議遂定先大父治家謹肅先大母吳太恭人率子婦承事若嚴君寢門內不聞聲歎聲兒啼聲我母年十八來歸性至敬慎操作尤勤力先大夫文名日益譟試屢不第先大父望愈切先大夫固泊於名而懼無以成親志也每報罷輒歎歎不自勝母始勸慰繼則相與飲泣遂成心疾幾殆先大夫官翰林僚值內廷母佐內政凡十數年攻苦食淡無異

未仕時逮先大夫奉

命視學山左也母喜曰夫子以二老人睽離故恆欲解組歸今遂迎養志矣孰意抵山左任甫七日而先大夫遽見背母痛絕時叔父儒林公在任所經紀含斂百方喻譬母母懼以一死益戚堂上心也度堂上聞此耗必不支必覲堂上乃徇庶無憾遂扶櫬挈孤間關旋里門先大母一見恩澤涕下不可止先大父復喻譬母數四母乃事先大父母愈敬慎操作愈勤力先大母憐之因勞曰爾處官舍十餘年尙能親饋爨可謂賢矣然我念



爾若是輒痛兒甚兒幸有子子賢不肖不可知但使我見兒勝其父之衣則我心釋然矣恩澤晝持束書侍先大父側夜則侍母側母篝鐙督恩澤讀恩澤弱且鈍吻燥口苦猶未成誦母且泣且口授向明必背誦無譌乃使詣先大父所恩澤年十五入泮先大父尙在年二十舉於鄉年二十七成進士官編修先大母尙在至是先大母謂母曰汝撫孤事已就兒出身事方起教不可一日弛也先大母見背後三年恩澤奉母官京師及奉使於外皆迎養母教責尤嚴常曰爾屢奉外使我豈不悅

然奉使以廉爲體以明爲用汝何能明惟廉則生明若不廉則負

聖恩悖先人德雖奉養極華盛我不歆也恩澤奉外使凡六年母食不重味躬服澣濯且晝夜兢惕惟恐恩澤或罣於過差嗚呼痛哉母中歲頻厄所冀幸者一弱子耳未成立則憂未學則憂未仕則憂及能粗給供養而來日又苦短也況外迫公事則定省缺久膺幽憂則疚疾頻求從容笑語于燕閒時蓋亦不數數覲也嗚呼痛哉母事先大父母極孝記先大父病嗽上氣疾母治饘

必使與方藥無悖及病革晝夜不敢休殯後哀毀盡禮  
先大母病風緩神志恍惚卧榻凡二稔母時年過六十  
晝夜侍旁潔飲饌浣厠膾衣不解帶者亦二稔及殯撫  
棺一慟齒無故自墮者二承兄叔姊姒以和御下公以  
寬生平無疾言遽色聞人有阨若身受戚族稱貸雖典  
質勿吝是非善惡了然而不欲明辨讀書通大義幼所  
習者至老背誦若流尤好岐黃書辨寒熱虛實雖專家  
不能奪也常誨恩澤曰爾務泛覽而寡要若力行仁恕  
則所業進矣又舉漢劉寬傳相示蓋以恩澤持公事過

弁急也嗚乎痛哉以恩澤憊愚而內不拂于家外不戾  
上徒以有母在也今且失母知不免于小人之歸矣  
恩澤生四十又五年自母視之猶孩提也寒暑飢渴日  
必三四詔焉今噢咻之聲猶尙在耳而望其曠已舉如  
也嗚乎痛哉慈孝如我母明智如我母而不得食子之  
報侍養無狀其又奚追嗚乎痛哉母以道光九年二月  
十六日卒得年七十有五子一恩澤孫一德威以先大  
夫官學士封恭人以恩澤官祭酒晉太恭人

程侍郎遺集卷八

譚瑩玉生覆校